

RADUNANZA CUMÜNELA

118. Protocol dals 11-02-2026 - 20.15 h

Il president cumünel, sar Romeo Cusini, po salüder 39 personas cun dret da vuscher a la radunanza cumünela illa Seletta a Zuoz. S-chüso es sar cusglier Flurin Wieser.

Il president cumünel constata cha l'invid cullas tractandas per la radunanza cumünela es gnieu tramiss tenor constituziun cumünela e tenor ledscha per vschinaunchas dal Chantun Grischun. Cunter la glista da tractandas nu do que üngünas objecziuns our dal ravuogl da la radunanza. Cun que vela la radunanza cumünela scu convocheda seguond uorden e cun que cumpetenta da decider.

Scu scrutinadura vain numneda e tschernida duonna Alice Bühler.

Il president gratulescha per la tscherna onurifica.

690 01 Organisaziun da vschinauncha
 01.C Radunanza cumünela
 01.D.01 Appruvaziun protocol
1. Protocols da las radunanzas cumünelas dals 4 november e 17 december 2025

Il protocol da la radunanza cumünela dals 4 november 2025 es sto publicho dals 2 december 2025 fin ils 2 schner 2026. Dürant il temp da publicaziun nu sun entredas üngünas remarchas e recuors. Il protocol vela cun que scu approvo.

Il protocol da la radunanza cumünela dals 17 december 2025 es exposet sülla pagina d'internet da la vschinauncha da Zuoz (www.zuoz.ch) suot „Radunanza cumünela“ ed in chanzlia cumünela daspö ils 16 schner 2026 fin ils 16 favrer 2026.

691 05 Educaziun e cultura
 05.B Generel e particulariteds
2. Cunvegna da prestaziun «post da coordinaziun scolaziun tampriva Engiadin'Ota»

Las vschinaunchas da l'Engiadin'Ota haun düraunt l'an 2025 elavuro üna strategia per la scolaziun tampriva. Tar la scolaziun tampriva as tratta que da spüertas aunz il temp ufficiel da scouline e scoula. Il böt es da coordiner, e cun que da rinfurzer e svilupper, las numerusas spüertas da la scolaziun tampriva in Engiadin'Ota. Ils cuosts totels per ün post da coordinaziun s'amuntan a CHF 70'000 l'an, chi vegnan spartieus süllas vschinaunchas tenor clev regiunela (part Zuoz CHF 3'700). La cunvegna da prestaziun ho üna düreda da quatter ans (2026 fin 2029). Il president cumünel agiundscha, cha la vschinauncha da Zuoz ho già l'an 2021 surpiglio las spüertas da la scolaziun tampriva scu üna da las prümas

vschinaunchas in Engiadin'Ota. Concret as discuorra da spüertas scu p. ex. gimnastica per genituors cun iffauts. La vschinauncha ho surpiglio la gestiun da la scolaziun tampriva scu incumbenza cumünaivla dal sistem d'educaziun, dal sistem da sandet e dal sistem sociel. Quists trais systems fuorman insembel ils trais pilasters principels dad üna furmaziun da chüra cumplexsiva.

Ün votant voul savair che cha la coordinaziun porta. Il president orientescha cha la coordinaziun regiunela es positiva per las spüertas sves e rinforza eir la collavuraziun traunter las vschinaunchas. Duonna Karin Casty, commembra dal cussagl da scoula, remarcha cha l'infurmaziun centreliseda spordscha a famiglias ün access pü simpel e survisibel a tuot las spüertas.

Zieva cha nu vain pü dumando il pled our dal ravuogl da la radunanza cumünela cuntinuescha il president cumünel culla votaziun. El dumanda la radunanza cumünela da seguir a la proposta dal cussagl cumünel dad appruver la cunvegna da prestaziun „post da coordinaziun scolaziun tampriva Engiadin'Ota“. La radunanza aderescha unanimaming.

692 02 Administraziun cumünela
02.H Votaziuns ed elecziuns
02.H.02 Tschernas da Chalandamarz

3. Propostas per las tschernas da Chalandamarz 2026

Il president cumünel orientescha sur da la situaziun a regard las tschernas da Chalandamarz 2026. El muossa tuot las caricass, cha la populaziun tscherna, inclus las caricass in tscherna:

Presidi cumünel	Temp d'uffizi restant	Prossima reelecziun pussibla	Remarchas
Cusini Romeo	1 an	2027	Tscherna da rimplazzamaint 2023

Cussagl cumünel	Temp d'uffizi restant	Prossima reelecziun pussibla	Remarchas
Blumenthal Alexandra	0 ans	2026	
Delnon Jachen	0 ans	2026	
Zala Sandra	1 an	2027	
Wieser Flurin	1 an	2027	Tscherna da rimplazzamaint 2023
Ferrari Cristian	2 ans	2028	
Tarnuzzer Ladina	2 ans	Limit temp d'uffizi	

Cumischiun da fabrica	Temp d'uffizi restant	Prosuma reelecziun pussibla	Remarchas
Albertin Remo	0 ans	2026	
Camichel Lothar	1 an	Limit temp d'uffizi	
Salzmann Marco	2 ans	Limit temp d'uffizi	

Cumischiun sindicato-ria	Temp d'uffizi restant	Prosuma reelecziun pussibla	Remarchas
Hardegger Andrea	0 ans	2026	
Bührer Alice	1 an	2027	
Arquint Niculin	2 ans	2028	

Cussagl da scoula	Temp d'uffizi restant	Prosuma reelecziun pussibla	Remarchas
Casty Karin	0 ans	2026	

Zieva cha que nu do dumandas a regard la survista cuntinuescha il president cumünel cullas propostas per las caricas in tscherna ils 1. marz 2026.

Cussagl cumünel: Duonna Alexandra Blumenthal sto a disposiziun per ün'ultierur trienni. Our dal ravuogl da la radunanza cumünela vain numno sar Ramun Ratti scu ulteriur candidat.

Cumischiun da fabrica: Sar Remo Albertin as metta a disposiziun per ün ulteriur trienni. Otras propostas nu vegnan fattas.

Cumischiun sindicatoria: Duonna Andrea Hardegger as metta a disposiziun per ün ulteriur trienni. Otras propostas nu vegnan fattas.

Cussagl da scoula: Numnedas e numnos vegnan our dal ravuogl da la radunanza cumünela duonna Anna Maria Bott, duonna Martina Camichel e sar Christian Pfister.

Ulteriuras propostas paun gnir inoltredas in scrit a la chanzlia cumünela fin venderdi ils 13 favrer a las 16:00h.

- 693 01 Organisaziun da vschinauncha
 01.C Radunanza cumünela
 01.C.05 Infurmaziuns
4. Orientaziuns

Il president orientescha sur dal seguaint:

Custodia: Duonna Silvia Neves es daspö ils 1. schner 2026 nouva collavuratura illa custodia cun ün pensum da 60%. Ella segua sün duonna Maria Olinda Rosario.

Mille Miglia – Coppe delle Alpi: In marz 2026 visitescha l’evenimaint cun veiculs „Oltimer“ l’Engiadin’Ota cun partenza e böt a San Murezzan. Ils tragets passan eir a Zuoz e cumpetiziuns haun lö süls tragets traunter Zuoz e Madulain e Zuoz e S-chanf sülla veglia via chantunela. Las cumpetiziuns nu sun sün temp, dimpersè sün precisium. Ils tragets haun da gnir serros, causa cha’ls veiculs vaun cun üna sveltezza bassa. Seguaintas serredas da via sun permiss dal cussagl cumünel:

- Gövgia, 12 marz 2026 Via veglia Madulain–Zuoz 15:15 fin 19:30h
- Venderdi, 13 marz 2026 Via veglia S-chanf–Zuoz 15:00 fin 18:30h
- Sanda, 14 marz 2026 Via veglia S-chanf–Zuoz 15:00 fin 19:00h

Chalandamarz 2026: Ils 1. marz da quist an do que al Chalandamarz üna emischiun da la televisiun Svizra directamaing da Zuoz traunter las 10:00 e las 12:00h.

- 694 01 Organisaziun da vschinauncha
 01.C Radunanza cumünela
 01.D.02 Varia
5. Varia

Ün votant dumanda da nouv zieva la situaziun da las localiteds i’l Center Sur En. Il president respuonda da nouv cha la situaziun dependa auncha adüna da la revisiun totela da la planisaziun dal lö, chi vain suottamissa a la radunanza cumünela ils 18 e 19 marz 2026. La visiun es aunch’adüna üna soluziun per hotelleria u misteraunza. Per hotelleria sun eir avaunt maun interessents.

Üna votanta dumanda zieva il scopo da la localited i’l plaun suot da la Posta Veglia. Zieva cha la banca chantunela spordscha in lur localiteds eir spazi per sedutas es ella da l’avis cha que nu fo sen, dad avair trais locals per sedutas. Il president po infurmer, cha la vschinauncha ho gieu contact culla banca chantunela a regard quist. Il local illa Posta Veglia es pondero da ster a disposiziun a la biblioteca per spüertas düraunt il temp d’aver-türa, scu p. ex prelecziuns, spazi per classas da scoula ed aunch’oter. Impü dess il local ster a disposiziun gratuitamaing a societeds. Que nu saro tar la banca chantunela pussibel.

Ün votant dumanda perche cha la radunanza cumünela dals 4 marz 2026 a regard il provedimaint da sandet in Engiadin’Ota es gnida spusteda. Il president infurmescha cha’l cussagl cumünel ho sün basa da las infurmaziuns a maun fin uossa diversas dumandas ed intschertezzas, ch’el voul sclarir per fer a la radunanza cumünela üna proposta fundeda cun ün purtret cumplexiv. Il votant dumanda scha que do ouravaunt üna saireda d’infurmaziun. Il president respuonda cha l’infurmaziun ho lö directamaing a la radunanza cumünela chi decida eir in chosa.

La prosmas radunanzas cumünelas haun lö ils 4 marz 2026 davart il futur dal provedimaint da sandet ed ils 18 e 19 marz per la revisiun da la planisaziun dal lö. Il president sperescha

sün üna partecipaziun numerusa. El ingrazcha a las votantas ed als votants per la cumparsa e serra la radunanza a las 20:45h in giavüschand a tuots üna bella saira, üna bella Prouva da Chalandamarz ed ün bel Chalandamarz.

Il president In buna fè l'actuar

Data da publicaziun:
Zuoz, ils 5 marz 2026